



Utfyllande reglement for orden og åtferd ved grunnskulane i Time kommune knytt til utbrotet av Covid-19

§1 Heimel

Time kommune har felles ordensreglement for skulane, «Forskrift om reglement for orden og åtferd ved grunnskulane». Ordensreglementet er heimla i Opplæringslova §9A-10 og vart vedteke av Levekår 10.april 2019.

På bakgrunn av Covid-19 pandemien, har skulane nå eit ennå større ansvar for å sikra helse, miljø og sikkerheit for alle elevar og tilsette ved skulane. Skulane har retningslinjer knytt til smittevern både for barneskulen og for ungdomsskulen.

Me står nå i ein situasjon kor me er avhengige av at alle tek smittevern på alvor. Ansvaret for å sikra elevane si helse, både fysisk og psykisk i denne perioden, er svært viktig. Elevane vil få opplæring i korleis dei skal oppstre saman, og føresette skal vera trygge på at det er forsvarleg å senda barn og ungdom på skulen. For å sikra dette, er det nå behov for eit utfyllande ordensreglement tilknytt Covid-19 utbrotet.

På bakgrunn av at me har særskilte smitteomsyn å ivareta, vil både «Forskrift om reglement for orden og åtferd ved grunnskulane» vedteke av Levekår 10.04.19 og «Utfyllande reglement for orden og åtferd ved grunnskulane i Time kommune knytt til utbrotet av Covid-19» vera gjeldande.

Utfyllande ordensreglement vil gjelda så lenge Covid-19 pandemien varer.

§2 Formål

På bakgrunn av at me har særskilte smitteomsyn og ivaretaking av elevane si fysiske og psykiske helse, er desse føremåla særskilt viktige:

Ordensreglemenet for skulane er eit verkemiddel for å sikra formåla i opplæringslova §§ 1-1 og 9A-1.

Formålet med forskrift om ordensreglementet er å fremma læring, tryggleik og trivsel, respekt og toleranse. Elevane skal læra å ta ansvar for seg sjølv og andre. Dei skal bli gode medborgarar som viser toleranse og respekt for alle. Alle har rett til eit skulemiljø som fremmar helse, trivsel og læring i tråd med §9A i Opplæringslova. Dette vil vera spesielt viktig i situasjonen me står i nå.

Forskrifta om ordensreglement vil og i denne samanhengen regulera kva som er god orden og åtferd, og vera grunnlag for å vurdera orden og åtferd på ungdomsskulane.

Tiltak knytt til brot på dette kommunale reglementet knytt til Covid -19, er heimla i §9A-10 i Opplæringslova, og blir knytt til Covid-19 og smittevern.

§3 Verkeområde

Desse reglane vil vera spesielt viktige for alle elevar som går i grunnskulen i Time kommune. Dei er gjeldande i skuletida, alle typar undervisningslokale, fellesrom og uteareal.

§4 Elevane sine rettar og plikter knytt til smittevern i Covid-19 situasjonen:

Elevane har rett til:

- Eit skulemiljø som gir tryggleik og sosialt tilhøyre
- Respekt for andre
- Respekt for private eigedelar
- Eit god fysisk og psykisk læringsmiljø
- Eit læringsmiljø som fremjar helse, trivsel og livsmeistring

Elevane har plikt til:

- Å bidra til eit godt miljø som fremjar helse, trivsel og læring
- Behandla alle med omsyn og respekt
- Å visa respekt for andre og skulen sine eigedelar
- Oppre varsamt i lag med andre, og overhalde smittevernreglar som er lokalt tilpassa skulen ut frå UDIR/FHI si rettleiing

§5 Orden

Det er god orden å

- bidra til at skulen sitt område er ryddig, og reint og hjelpe med å forhindra smitte av Covid-19.

§ 6 Åtferd

Det er god åtferd å

- inkludera medelevar og syna respekt, ikkje krenka andre fysisk
- Retta seg etter beskjedar ein får frå tilsette
- Bidra til at skulen er ein trygg stad for alle å ferdast der, og ikkje utøva ei framferd som kan føra til at andre blir smitta, eller skapa eit utrygt miljø for medelevar og tilsette
- Følgja skulen sine retningslinjer knytt til smittevern, og tiltak som er knytt til Covid-19

§7 Sanksjonar

Alle sanksjonar tilknytt «Utfyllande reglement for orden og åtferd ved grunnskulane i Time kommune knytt til utbrotet av Covid-19» skal sjåast i samanheng med tiltak i forhold til smittevern, og at alle elevar skal ha eit trygt læringsmiljø, både fysisk og psykisk.

Tiltak skal sjåast i samanheng med eleven sin alder.

Sanksjonar skal vera individuelle. Kollektiv straff kan ikkje nyttast.

Elevar har plikt til å gjennomføre pålagde sanksjonar. Det kan påleggast nye sanksjonar om dette ikkje blir gjort.

Skulen kan ikkje bruka fysisk refsing eller krenkande behandling som sanksjon.

Sanksjonar må særskilt ta omsyn til andre på grunnlag av smittevern, og andre elevar sitt skulemiljø, både fysisk og psykisk.

§7-1 sanksjonar ved brot på utfyllande ordensreglement tilknytt Covid-19:

- Munnleg irettesetting av tilsette ved skulen.
- Munnleg eller skriftleg melding til føresette.
- Eleven kan tilvisast eige rom i undervisningstida for å få opplæringa under tilsyn av vaksen
- Eleven kan i friminutt tilvisast bestemte uteareal.
- Eleven kan utvisast: Opplæringslova §9a-11: Ved særleg provoserande åtferd/ smittefarleg åtferd knytt til Covid-19, kan elevar på 1.-7. trinn visast vekk resten av dagen. Elevar på 8.-10. trinn kan visast vekk resten av dagen eller 1-3 dagar. Elevar må uansett alder nå i Covid-19 situasjonen bli henta av føresett. Det er rektor som i desse sakene skal fatta vedtak om bortvising.
- Sak kan meldast til politiet. Dette gjeld elevar på ungdomstrinnet. Ved alvorleg/vedvarande farefull atferd, kan rektor melda saka til politiet

§8 Bruk av fysisk makt

Eit smittevernstiltak er å halde avstand. Det kan likevel koma situasjonar der elev har ei framferd som gjer at skulemiljøet blir utrygt, og andre kan bli smitta av Covid-19. Tilsette har moglegheit til å nytta naudverje for å hindra at elevar skadar seg sjølv **eller andre** jf, straffelova §§ 17 og 18.

§9 Saksbehandling ved grove brot på utfyllande ordensreglement tilknytt Covid-19

§9-1

Eleven har rett på å forklara seg, og har rett til å ha med seg ein person. På grunn av at Corona-19 situasjonen er så alvorleg, er det likevel viktig at tiltak frå skulen kan koma i gang med tiltak raskt. Dei føresette skal så raskt som råd få informasjon om situasjonen, og elev og føresett har rett til å uttale seg. Det kan i Covid-19 utbrotet setjast i verk tiltak og sanksjonar raskt på grunnlag av smittevern og for å trygga elevane sitt fysiske og psykiske miljø.

§9-2

Denne forskrifta gjeld frå 27.04.20 og så lenge Covid-19 pandemien er pågående.
Reglementet skal gjerast kjend for elevar, foreldre og tilsette. Det er rektor som har ansvar for dette.
Reglementet skal vera tilgjengeleg på kommunen og skulane sine nettsider.